

## Berjabat Tangan dengan Perempuan Haram Hukumnya

Jawapan atas pertanyaan mengenai fatwa Hamka yang

menghalalkan berjabat tangan di antara lelaki dengan

perempuan.

\* \* \*

Ahmad bin Muhammad Amin, Geylang Serai Singapura bertanya: Baharu-baharu ini ulama Indonesia yang terkenal, tuan Hamka di dalam temu ramahnya dengan Berita Minggu, dikatakan berkata bahawa soal pokok bagi seseorang Islam ialah iman kepada Allāh dengan rukun-rukun iman yang enam dan rukun Islam yang lima. Soal-soal tudung kepala wanita, soal berjabat salam antara lelaki dengan perempuan, soal pergaulan antara lelaki dan perempuan untuk kepentingan masyarakat merupakan soal detail, bukan soal pokok. Seterusnya ia berkata bahawa soal berjabat salam antara lelaki dengan perempuan atau bertudung kepala atau tidak bagi wanita-wanita itu haram atau tidak haram berdasarkan soal: Apakah keadaan dan perbuatan itu menimbulkan syahwat atau tidak.

Dengan kenyataan tuan Hamka yang tersebut saya suka mendapat keterangan daripada tuan:

- Apakah hukum yang detail itu boleh dilakukan atau dilanggar oleh seseorang Islām?
- 2) Apakah hukum yang ditentukan oleh Tuhan itu,

umpamanya berjabat salam boleh dilakukan kerana tidak ada syahwat di dalamnya?

3) Apakah kerana kepentingan masyarakat hukum yang ditentukan Tuhan berubah hukumnya?

Jawab: Dalam keterangannya kepada *Berita Minggu*, tuan Hamka memandang bahawa soal tudung kepala wanita, soal berjabat salam di antara lelaki dengan perempuan (yang dikatakan dilakukannya sendiri), soal pergaulan di antara lelaki dengan perempuan untuk kepentingan masyarakat merupakan soal *detail* – bukan soal pokok – sedang soal pokok ialah iman kepada Allāh, percaya kepada rukun iman yang enam dan rukun Islām yang lima.

Setelah menyiasat kita memandang bahawa tuan Hamka cuba hendak memusing-musing hukum yang tertentu yang tidak ada khilafnya hendak dijadikannya soal yang mengenai masalah *khilāfiyyah*. Soal-soal itu dipandangnya sebagai *detail* padahal soal itu ditentukan oleh al-Qur'ān dan hadīth Nabi yang wajib diimani kerana kalau seseorang tidak beriman kepada Rasul-Nya dan kitab-Nya (ertinya apa-apa yang diperintahkan dan dinyatakan oleh al-Qur'ān — sebagai kitab yang akhir yang wajib diimani maka orang itu telah melanggar ajarannya) sekalipun ia bertentangan dengan "kepentingan masyarakat" kerana kepentingan masyarakat itu tidak boleh mengubah tiap-tiap sesuatu yang ditentukan — *detail-detail* yang terkandung di dalamnya.

Hukum-hukum *detail* di dalam Islam – ertinya hukum satu persatu yang dipaparkannya – bukan *furu* ' – cabang, adalah wajib ditaati sekiranya yang demikian itu cukup jelas disebut dan diterangkan daripada kitab Allah dan sunnah. Hal ini tidak dapat dibuat dalih kalau seseorang hendak melakukannya lalu dengan perbuatannya

itu cuba meringankan hukum-hukum Allah. Umpamanya:
seseorang yang telah dinamakan dirinya ulama tentulah wajib
baginya mengawal dan menjaga taraf itu dan janganlah
pula ia berdua muka, kalau ia menjadi pujangga
lalu masuk ke tempat joget, duduk melihat orang
berjoget lalu mengatakan sifat saya di sini bukannya
sebagai ulama tetapi sebagai pujangga. Apakah dua
rupa atau ada dua hati di dalam dada manusia? Tentunya
tidak!

Di dalam beberapa hadis Nabi terang dan jelas diterangkan bahawa tiga perkara yang tersebut adalah sangat ditegah. Kalau tuan Hamka melakukannya kemudian membuat hukum kerananya, mengharuskannya kerana ia telah berbuat padanya maka yang demikian adalah merosak kepada dasar-dasar Islam. Kalau ia melakukannya sendiri — tidak membuat atau menghukum padanya, maka itu terpulang kepadanya tetapi melakukan lalu menghukumkan harus membuatnya dengan "sebab darurat" maka yang demikian adalah melakukan sesuatu perbuatan yang menarik orang lain melakukan demikian kerana kelak orang-orang awam akan berkata — makruh sahaja hukumnya menurut tuan Hamka. Bukankah tuan Hamka seorang alim dan pujangga, boleh ikut sahaja kepadanya?

## Mengenai Tudung Perempuan:

Firman Allāh: wa lā yubdīna zīnatahunna illā mā zahara minha wal yaḍribna bikhumurihinna 'alā juyūbihinna – (Q. Al-Nūr 31).

Maksudnya: Janganlah mereka (perempuan-perempuan) itu menampakkan perhiasan mereka melainkan apa yang lahir sahaja, dan hendaklah mereka hulurkan tudung kepala mereka di atas dada mereka. (Yakni hujung tudung kepala itu, hendaklah mereka belitkan di leher mereka

dan hulurkan di atas dada mereka, supaya dada itu tertutup).

Apakah yang lahir sahaja itu? Ini diterangkan oleh dua hadis yang tersebut di bawah ini yang menerangkan ayat yang tersebut (ertinya):

Ibnu 'Abbās berkata: Perhiasan yang zahir itu ialah muka, celak mata, bekas inai di tangan dan cincin (Riwayat Ibnu Jarīr).

Satu hadis lagi: Telah berkata 'Ā'ishah:

Sesungguhnya Asmā' binti Abū Bakar pernah datang menghadap

Nabi (S.A.W.) dengan berpakaian nipis, maka sabda

Rasulullah: "Hai Asmā'! Sesungguhnya seorang

perempuan apabila cukup umur tidak boleh dilihat

dia melainkan ini dan ini, sambil Rasulullah

mengisyaratkan kepada muka dan dua tangannya. (Hadis

riwayat Abū Dawūd).

Untuk menguatkan ini lagi maka Allah berfirman:

Yā ayyuha al-nabiyyu qul li azwājika wa banātika wa nisā'i al-mu'minīna

yudnīna 'alayhinna min jalābībihinna (Q. Al-Aḥzāb – 59).

Maksudnya: Hai Nabi: Suruhlah isteri-isterimu dan anak-anakmu dan perempuan-perempuan Islam menghulurkan tudung sarung mereka ke atas (muka) mereka.

Maksud dengan ini hendaklah selain daripada
memakai tudung kepala seperti yang tersebut pada ayat
al-Nūr hendaklah perempuan-perempuan itu memakai tudung
lagi dari atas itu dan tudung-tudung itu hendaklah
dihulurkan sedikit ke muka.

Di dalam permulaan Islam maka Rasulullah (S.A.W.)
selalu mengambil ba'iah (ikrar perjanjian bersetia)
dengan orang-orang Islam termasuk perempuan-perempuan. Perkara
ini sangat mustahak. Rasulullah berpegang tangan
dengan lelaki dalam bai'ahnya tetapi Rasulullah tidak

berpegang tangan dengan wanita dalam mengambil bai'ah itu.

Rasulullah (S.A.W.) bersabda (ertinya): Sesungguhnya aku tidak berjabat tangan dengan perempuan. (Hadis diriwayatkan oleh Mālik, al-Tirmidhī dan al-Nasā'i).

Beberapa hadis lagi ertinya: Telah berkata

'Ā'ishah: Tidak pernah sesekali tangan Rasulullah (S.A.W.)

menyentuh tangan perempuan yang tidak halal baginya.

(Sahih riwayat Bukhārī dan Muslim).

Telah berkata 'Ā'ishah: Tidak! Demi Allah, tak pernah sekali-kali tangan Rasulullah (S. A.W) menyentuh tangan perempuan (asing), hanya ia mengambil bai'ah (perjanjian) mereka dengan perkataan. (Sahih riwayat Bukhārī dan Muslim)

Telah berkata 'Ā'ishah: Tidak pernah sekali-kali
Rasulullah menyentuh tangan seorang perempuan
(asing) – Sahih riwayat Bukhārī dan Muslim.

Ditikam seseorang daripada kamu di kepalanya dengan jarum dari besi itu ada lebih baik daripada ia bersinggulan bahu dengan perempuan yang tidak halal baginya. (Hadis sahih riwayat al-Ṭabarānī).

Seorang lelaki yang bersinggulan dengan babi yang berlumuran dengan lumpur itu lebih baik daripada ia bersinggulan bahu dengan perempuan yang tidak halal baginya. (Sahih riwayat al-Ṭabarānī).

Dengan ini jelas, kalau berpandangan ditegah maka tentulah lagi berjabat tangan. Adakah hukum-hukum yang ditentukan al-Qur'ān dan Hadīth Nabi yang diimankan atau menjadi rukun iman yang dipercayai sebagai asas Islam boleh dilakukan kerana "di dalamnya tidak ada syahwat" dan kerana kepentingan masyarakat?

Sebab-sebab ini ialah sebab-sebab yang diada-adakan untuk meringankan hukum-hukum agama. Sekiranya yang berkenaan hendak melakukannya — walaupun lebih daripada itu, umpamanya kalau ia datang di suatu tempat, dan adat tempat itu cara bersalamanya bercium, dan tidak bertujuan syahwat, maka kalau ia melakukan silakan tetapi membabit hukum-hukum agama yang maha suci dan memandang sebagai tegahan yang ringan, yang demikian ini adalah suatu perkara yang berbahaya sebab orang-orang awam kelak akan mengatakan ulama Indonesia itu telah menghalalkan sedang ulama-ulama di Malaya ini tolol tidak tahu hukum-hukum.

Kita berpendapat bahawa berjabat tangan di antara lelaki dengan perempuan adalah sangat keras ditegah. Perbuatan-perbuatan berjabat yang dilakukan oleh ulama seperti yang dibuat oleh Hamka adalah suatu perbuatan yang berbahaya, yang menurut pandangan kita, sangat meringankan tegahan-tegahan Tuhan seperti yang disebut di dalam beberapa hadis itu. Sebab-sebab seperti tidak ada syahwat dan kerana kepentingan masyarakat, seperti yang dikatakan oleh Hamka itu tidak boleh dijadikan hujah sebab hukum yang tertentu itu tidak ada disandarkan boleh berubah kerana sesuatu sebab. Rasulullah sendiri mengetahui betapa pentingnya bai'ah dan tidak ada tujuan syahwat atau tidak bersyahwat di dalam mengambil bai'ah itu, Rasulullah tidak berjabat tangan dengan wanita yang bukan halal baginya. Perkara-perkara detail bukannya perkara-perkara yang diperselisihkan kerana ia tetap ketentuannya – tidak boleh diubah-ubah apabila ia sah hukumnya daripada Allāh dan Rasul-Nya.

\* \*